



**Russia-i Ukraine yimtiba
nung nisung 12 tepset**

**Tamil Nadu CM Vijay-i
Mettur dam lapoktsüogo“**

VOL. XXIII ISSUE NO. 321 (ADOK 321) DIMAPUR RASEMNÜ (WEDNESDAY) RONGJUI (SEPTEMBER) 02, 2026 ₹ 5.00

NSF-i Vande Mataram ozüing anema Assembly kima lungkak aiter

Kohima, September 1, 2026 (TYO): Naga Students' Federation (NSF)-i Mongulbarnü Naga Solidarity Park nungi Nagaland Legislative Assembly kishi tashi lungkak aita jajaogo aser iba ya Vande Mataram tendaktsüba ozüing anema lir.

Lungkak aiter temi Assembly matong tashi yimym ayima shilem agi aser kishi atongba sülen Minister o MLA tem Assembly session-i arudang lungkak ait.

"NSF-i Naga nunger temetentem aser tamangba yimsü nung mekongshidaktsütsü. Tanü onok nübo ishika dang saka iba ya Naga nunger tashi lir. Naga nunger ya Khristan tamangertem lir aser asenok tamangba yimsü tangatetba nungi masetshitsü" ta NSF president Mteisuding-i ashi.

Iba tebilemstü ya NSF meyong dang masü saka Naga nunger ajak asoshi lir. Naga sensotemi tejakleni arutsüla aser asen tamangba yimsü kümzüka ayutsü atema noktaktsüla ta pai ashi.

Asen tamangba yimsü anema Vande Mataram ozüing benokba khenyongi magizüker ta Mteisuding-isa ashi.

Iba lungkak aitba sentong ya linük mesüra national song mezüingmeshitsü atema

ayongzüka masü. Saka asen tamangba yimsü dak kongshidang Naga nungeri Naga loktiliba nung parnok tebilemba mesüra tamangba yimsü magizüktü ta paisa ashi.

Paisa Naga MLA tem dang tamangba yimsü tangatetba nung temulung agütsütsü ayongzü. "Parnok ya mezüing Khristan, aser iba sülen jiang yimsüsür ka lir" ta NSF president Mteisuding-isa ashi.

Nagaland Legislative Assembly-i Nagaland nung official aser private programmes nung Vande Mataram atenba mesüra atemba anema bangzüng ka renemtsü akhanger. Iba ya loktiliba nung secular tangatetba kümzüka ayutsü atema lir ta pai ashi.

NSF-i Chief Minister aser Assembly Speaker naprong dang Vande Mataram anema Assembly bangzüng ka renemtsü shidi züluogo ta Mteisuding-isa shisem.

NLA-i bangzüng ka merenem tashi NSF-i lungkak aittsü aser Assembly gate kima nungi mainshitsü ta paisa ashi.

Naga nunger ya Khristan tamangertem lir aser Naga MLA temi pei nübor tamangba yimsü tangatetba atema tebilemstü abentsüla ta NSF editor Pithungo Shitio-ia ashi.

NLA nung FCRA Bill atema jembi saka bangzüng mali tembang

Kohima, September 1, 2026 (TYO): Mongulbarnü NLA monsoon session tenzüka anogo nung Foreign Contribution (Regulation) Amendment Bill, 2026 benoka lemsatep saka Assembly resolution kecha mali tembangogo.

Centre-i Joint Parliamentary Committee (JPC) ka nem Foreign Contribution (Regulation) Amendment Bill, 2026 reprangshitsü lemtetba pelashishia agizüker ta Nagaland Chief Minister Neiphiu Rio-i olemtepdang ashi.

Iba inyakyim ajanga Nagaland nung arogotem aser Khristan teloktemi tebilemstü abenbatem agizüka angadangtsü maongka angutsü ta CM Rio-i ashi.

August 9 nü Nagaland Baptist Church Council, Diocese of Kohima aser Nagaland Joint Christian Forum den asüngdangtepba sülen Union Home Minister Amit Shah dangi shidi zülu ta pai ashi.

Nagaland nung arogotem aser Khristan teloktemi education, healthcare, poverty alleviation, social welfare aser humanitarian assistance nung tongtipang shilem agia arur. FCRA akangshiba ajanga senotsü amshiba aser ketdangsübaren nung khuret ajurutsü aser welfare

programmes nung kongshitsü. Nagaland state indang lokti aser putiotsü khenyongi balaka lir anungji Nagaland teloktem indang onüktem balaka asadangtsüla ta CM Rio-isa ashi. JPC ajanga tebilemstütem angadangtsü, tarentakba agientsü aser public-i tamang akatsüsa inyaktü. State sorkari Centre aser sendaktepa alirtem den iba onük asoshi jembitsü ta paisa ashi.

FCRA atema olemtepba mapang MLA Achumbemo Kikon-i Centre dang iba Bill meyipa agitsü ayongzü. Iba bill nungaliba inyakyimtem

ajanga nübo agi tangar memenepertem, arogotem aser charitable organizations dak kongshitsü. Bill nung benoka aliba onüktem ajanga FCRA renewals kanga tasak kümdaktsür aser government-designated authority ka nem registrations agienba teloktem meyong rongsen agitsü tashi agütsür. Arogo teloktemi education, healthcare aser social welfare asoshi inyakba rejutemi timtem ajurutsü ta tebilemstü balala lemsaogo ta Achumbemo-isa ashi.

Iba Bill ajanga Arlla 25, 29 aser 30 den Nagaland kümzüka ayuba Arlla 371A asoshi tetsükdaktsü bentsür arutsü. Anungji JPC-i arogotem, civil society organizations aser tanga

sendaktepa alirtem den asüngdangteper ang parnok tebilembatem abentsü ayongzüker ta paisa ashi.

Iba tebilemstü ya Hindu-Christian onük ka masü saka Naga nunger ajak dak kongshiba onük ka lir, anungji Assembly-i JPC tsüngdang ola ka dang adoktsü ayongzüker ta MLA P. Longon-i ashi.

"FCRA melenshiba ajanga arogo tilatem aser teküpoktiba jenjang nung inyakba teloktem nem timtem talila bentsür arutsü, international partnerships den tesentaktep raksatsü aser tanur, tetsür, matamabensartem, teintet rogo aser sensakertem asoshi inyakba maparen nung kongshitsü" ta Kudecho Khamo-ia ashi.

MLA Temjenmenba aser MLA Y. Mankhao Konyak naprongi olemtep nung benokba tebilemstütem pusema jembi aser Centre o JPC ajanga Assembly, arogotem aser civil society organizations-i mepishiba angashitsü teimla aliba metetdaktsü.

Nagaland nung arogotem aser rejutemi Nagaland Legislative Assembly ajanga bangzüng ka renemtsü ta imla liasü saka tanü FCRA olemtep nung Assembly resolution kecha mali dang tembangogo.

NLA nung revised Frontier Nagaland Territorial Authority (FNTA) Bill, 2026 benok

Kohima, September 1, 2026 (TYO): Nagaland Legislative Assembly nung Mongulbarnü revised Frontier Nagaland Territorial Authority (FNTA) Bill, 2026 benokogo.

Iba Frontier Nagaland Territory Authority (FNTA) nung Tuensang, Mon, Longleng, Kiphire, Noklak aser Shamator adener.

February 5 nü Centre, Nagaland sorkar aser Eastern Nagaland Peoples' Organisation (ENPO) tsüngda Memorandum of Agreement sign sütepba nung amendaker iba Bill ya benokogo. FNTA Bill ajanga Arlla 371A kübok state sasep nung democratic aser decentralised self-governance amenoktsü ashir.

FNTA nung züngsem 62 alitsü aser parnok rongnung indangindanga shimtetba züngsem 40, Governor-i nominate asüba züngsem 2 aser FNTA nungi shimtetba MLA 20 voting rights melii ex-officio members ama adentsü ta Bill nung shia lir.

Menden ajunga nungi asemsü nung shilem ka tetsürtem atema lemozüka ayutsü aser züngsemtem indang kümsük küm pungu asütsü aser State Election Commission ajanga

election ketdangsüa agitsü ta Bill nungsa shia lir.

FNTA nung züngsem 9 agi akümba Executive Council ka alitsü aser ibaji Chief Executive Member (CEM) aser Deputy Chief Executive Member nati len anitsü.

CEM aser Deputy CEM nem Cabinet Minister-equivalent protocol status, aser tanga Executive Council members nem Minister of State-equivalent status agütsütsü aser iba ya FNTA sasep atema asütsü.

Mezüngbuba election magidang züngsem 13 agi akümba Interim Council ka tentetstü aser iba ya ENPO-i tribal council tem den asüngdangtepa tentetstü ta sorkari shidanger. FNTA nungi MP ka aser MLA aseme advisers ama inyaktü akok ta parnokisa ashir.

Interim Council-i talangtiba agia küm ka mesüra FNTA election magi tashi inyaktü akok ta state sorkarisa Bill nung shia lir.

Bill nungsa district level tashi agriculture, non-reserve forests, irrigation, fisheries, primary healthcare, school education up to higher secondary level, horticulture, labour and employment, land records and

revenue, rural development, social welfare, tourism projects within ENPO areas, village guards, water resources, youth and sports, handloom and handicrafts, housing, tribal affairs, public health engineering, food and civil supplies, markets and fairs, DUDA, customary courts aser fire and emergency services up dena FNTA nung adentsü shidanger.

Ajisüaka, Geology and Mining bo state sorkar den dang ayutsü aser FNTA kübok regional office ka alitsü ta Bill nungsa shia lir.

FNTA-i integrated development plans renemtsü, schemes mapa küma inyaktü, belena aoba subjects atema ozüing aser inyakyim latetstü tashi agütsütsü. Ajisüaka ozüing kechi yangludir yangluaka state sorkar dang abenba sülen Governor nungi temelaba meshitsüla aser iba sülen jiang State Gazette nung sangdonger mapa akümtsü ta Bill nungsa shia lir.

FNTA nung administrative structure balaka alitsü aser ketdangsürtem pei pei State cadres nung adentsü. Additional Chief Secretary jenjang tashi aser Principal Secretary den temaba IAS officer ka CEM den asüngdangteper Chief Executive

Secretary (CES) ama shimtsü. Maneni FNTA headquarters nung Additional Commissioner ka mapa lemozütsütsü ta Bill nungsa shia lir.

FNTA-i administrative aser developmental functions atema kümshia senotsü lemozütsütsü aser amshitsü ta Bill nungsa shia lir.

State sorkari ashiba nung ajemdaker Governor-i senotsü lemozütsütsü aser Eastern Nagaland indang development outlay ji common expenditure agizüka sülen nütsüing yongsük aser litsü nung amendaker lemsatsü ta FNTA Bill nung ashir.

FNTA indang budget ji State Budget nung separate major sub-head ka nung ama enoktsü. FNTA-i annual plan renemtsü aser village-level development nüngdakbatem nung ajemdaker planning and finance amenoktsü akok.

FNTA nem terenlok atema senotsü lemozütsüba ajak CAG audit asütsü aser financial year tembangba shia Assembly tsüngdang audit report aser Action Taken Report lemsateptsü ta Bill nungsa shia lir.

FNTA nung law and order tsütsü IGP Range-level IPS officer ka FNTA headquarters

nung mapa lemozütsütsü aser police administration ketdangsütsü. Iba Bill nungsa border-area security akangshitsü aser Central teyari agia Village Guards tajungba akümtsü shia lir.

FNTA Bill nungsa Arlla 371A, Bengal Eastern Frontier Regulation, 1873 amshitsü aser Panchayati Raj provisions nung madentsü ashir.

Ministry of Home Affairs, Nagaland sorkar, FNTA aser ENPO nungi teshimtet nübotem adenba Joint Monitoring Committee kati February 5 agreement mapa inyaktüba meyipa reprangshitsü ta Bill nungsa shia lir.

FNTA-i timi meinyakra mesüra political timtem kar ajanga ketdangsüa moutetra Governor-i FNTA anentsütsü mesüra loksatsü aser Administrator ka shimtsü FNTA Bill-i tashi agütsür, saka iba inyakyim ya ita trok dak talila maotsü.

Deputy Chief Minister Yanthungo Patton-i tanü assembly nung taküm Budget session nung benokba Frontier Nagaland Territorial Authority Bill, 2026 agientsü benok aser ibaji agizüka sülen nung Bill tasenba benoka liasü.

'Tune Up Channel' band asendenshia music video tasen ka saya



Mokokchung, 1st September (TYO): 'Tune Up Channel' band pur küm asem shi anisüngzüik agir külen tanaben asendenshia English nung mejemba music video tasen ka tenüing agi "No More Shot" ta sür Mungulbarnü Mokokchung Deputy Commissioner Ajit Kumar Verma IAS-i yangi Hotel Whispering Winds nung meraketa sayatsüogo.

2015 nung tenzüikba Tune Up Channel ya Nagaland nungi nüngtugu pop-rock band ka lir. Taoba mapang par band nung vocalist ji Sunep A Jamir liasü, saka pa tangbo Mumbai len or aliba ajanga pa melena Sentien Kichu aniok. Tanüingba band züngsemtembo akhi ama kasa Guitarist – Temjen Lemtur, Keyboardist – Ayu Mongro aser Drummer – Avizo Solo lir. Ano osang tasen kaji par telok nung Band Manager tasen Arenlong aser Legal Advisor – Imchayanger na shimogo.

Tune Up Channel ya tenzüiker küm 10 shi arudang

parnoki takok aika ngua lir. Item rongnung kar yangi agütsür – Hornbill International Contest 2015 nung Best Nagaland Band; Youth Fest Clash of Bands Nagaland 2016 nung Winner; NSACS Life Now Beat Contest 2017 nung Best Original Song; NSACS 9th Multimedia Campaign Nagaland 2019 nung Winner; aser 2nd Multimedia Campaign Northeast India Imphal, Manipur 2020 nung 2nd Runner-Up nguteta lir.

Iba den külemi India tesem balala nung tongtibang kenten benjong - Sonabyss North-East Institute of Science & Technology 2016; Orange Festival Dambuk Arunachal Pradesh 2016; Hornbill International Music Festival 2017 & 2021; 5th North-East Indigenous Music Fest Dimapur 2018; 8th North-East Annual Day 2018 (Centre for NE Studies & Policy Research Jamai Millia Islamia - Delhi); Golden Jubilee Naga Students Union Mumbai 2021; North-East Zone Cultural

Fest 2022 Dimapur; Nagaland Cultural Fashion Show Cum Music Fest 2022 Goa, aser ano tongtibang sentong tulu aika nung parnoki tongti shilem agiba lir.

Küm asem shi khen anisüngzüik agir külen, tanaben asendenshia tashi tasen nung nisung kar anioksemer mera tasen ka agia ken tasen ka mejema sayaogo. Tune Up channel nung vocal tasen anioker külen taonung sayaba "No More Shot" ken ya mezüing asütsü. Nenoki iba ken ya parnok indang YouTube Channel nungi reprangtetsü.

Tetushi tesemdanger Ajit Kumar Verma-i mapang tatsüka agidang, Tune Up Channel band-i tensa den apet ken tasen mejema music video yangluba asoshi pelaba den nenok amai Mokokchung nung ya lanur sempet aketer jenti lir, anungji, kentenmenü & kongki (music) tsütsü putu den sütepa tasentasen yangerloka bener aotsü merangang, ta tayongzüikba ka agütsü.

Sikkim nunga state indang CMHIS ama amshitsü akok

Dimapur, Luroi/Sept 01 (TYO): Sikkim nungi ketdangsür telok kati Nagaland Chief Minister's Health Insurance Scheme (CMHIS) inyakyim asadangtsü atema anogo ana atema Nagaland semdangba mapang August 31, 2026 nü Development Commissioner, Y. Kikheto Sema den Nagaland Civil Secretariat, Kohima nung ajurutepa liasü.

Sikkim nungi arurtem ya Karma N. Bhutia, Secretary to the Chief Minister of Sikkim; Depen Sharma, Special Secretary, Chief Minister's Office; Dr. Subash Tamang, Chief Medical Officer to the Chief Minister aser Tenzing Chopel Bhutia, Staff Officer to the Chief Medical Officer nungertem liasü.

Parnok sensaksemba mapang Development Commissioner, Y. Kikheto Sema-i CMHIS indang tetenzük

nungi tang tashi inyaka aruba osang tejangja lemsatepa liasü. Iba scheme tetenzüklen timtem balala ajuru aser item rongnung hospital empanelment peria magitetba, reimbursement rates meperiba timtem dena liasü aser State sorkari reprangshima reimbursement rates tajungba akum aser empanelled hospitals timba akum, ta pai ashi.

Iba scheme kübok tang linük tesem balala nung mozüki 70 dak tema empanelled süa lir aser item rongnung Nagaland nungi Delhi, Kolkata aser Guwahati ama yimtimtem nung aiben bushiba mozüki tem dena lir, ta Sema-i ashi. Iba network nungya State telungzüik nunga governing aser private hospitals tem dena lir ta ashi.

CMHIS kübok teyari agütsü nisung 64,000 shi tenüing zülüoka lir aser iba scheme tenzüiker küm pezü jungnüa arudang nüburtem temang

anepaluba as oshi sen crore 252 shi agütsüogo, ta ashi.

Nagaland nung alir Pradhan Mantri Jan Arogya Yojana (PM-JAY) küboki maitba nisung aika CMHIS küboki aitdaksüogo, ta pai ashi.

Tarurtem tenüing nung Secretary to the Chief Minister of Sikkim, Karma N. Bhutia-i jembidang, Nagaland indang health insurance model asadangtsü maongka agütsüba asoshi pelaba lemsatepa liasü.

Sikkim nunga Nagaland model ya amshitsü tebilemba lir, aser iba atema Nagaland sorkar nungi technical tsütsü lenmang sayua maneni amalitep akatsü imlar, ta Bhutia-i ashi.

Parnoki Planning aser Health Department aser tanga sendaktepa aliba department tem den sensak asemstü aser teshimtet institution aser facility tem semdanga CMHIS aser tanga terenlok maparen asadangtsü.

NEZCC-i empanelment aser renewal atema application meshir

Dimapur, Rongjui/September 01 (TYO): North East Zone Cultural Centre (NEZCC), Ministry of Culture ajanga NEZCC indang züngsem state ti nungi artistes, performers aser cultural groups tem empanelment tasen aser renewal atema applications meshir.

Empanelment aser renewal maparen ya September 2026 tashinung renemtsü. Performing artists atema arishi küm ya 18 aser 35 tsüngta asütsüla,

kentener aser accompanists atema arishi küm 55 tashi agizütsü.

NEZCC sentong tem nung shilem agütsü jangra aliba artistes, performers, folk and tribal cultural groups, artisans/crafts persons, ethnic traditional cuisine artisans, traditional game performers aser tanga cultural groups tem latetja aliba mapang apply asütsü ayongzüiker, ta sangdong ajanga ashi.

NEZCC nung empanelled

süa aliba artists aser telok temi renewal atema apply asütsüla. Iba mapang empanelled asür mesüra renew asürtem ya NEZCC sentong tem nung shilem agidaksütsü asoshi shimtsü. Application forms aser osang tejangja NEZCC website nezccindia.org.in /Home/ Advertisement nung angütsü. Application dak sendakba nung teyari aginer temi North East Zone Cultural Centre, Dimapur den tongteprateptsü akok, ta sangdong ajangasa ashi.

NITI Nagaland-i 4th Morung Scholarship Test 2026 sangdongogo

Dimapur, Rongjui/September 01 (TYO): NITI Nagaland ajanga 4th Morung Scholarship Test sangdonga Nagaland tesem balala nungi aser Manipur aser Assam nungi schools, colleges, principals, tsürabor aser Science azünger kaketshirtem dang iba sentong nung shilem agütsü ayongzüik.

4th Morung Scholarship Test 2026 ya September aser October ita Honibar anogo ajunga nung agütsü, anungji kaketshir temi scholarship aser senpet atema tokteptsü maongka aika agütsütsü, ta sangdong ajanga ashi.

Ibai Class XI, Class XII aser Repeater/Droppers Science azünger atema lir aser talisa NEET aser JEE ama competitive examinations renemba nung kaketshirtem yariiba nung tali rangloker.

Morung Scholarship Test kübok takok tajung nguteter aser langa aliba kaketshirtem category shia sen 10,000 tashi angütsü aser iba den NITI Academy programmes balala atema scholarships shilem 100 tashi angütsü.

Scholarship ya NEET Repeaters, JEE Repeaters & NEET/JEE Crash Courses, Physics, Chemistry, Mathematics & Biology tuitions aser NITI Academy ajanga

agütsüba tanga academic aser competitive-examination atema alitsü.

Scholarship aser senpet ya kaketshir temi test agütsüba nung ajemdaker scholarship programe indang eligibility criteria aser terms nung aliba ama agütsütsü, ta ashi.

Kaketshir timba shilem agidaksütsü mechi Scholarship Test ya shilem agiba schools/colleges nung agütsü.

Iba NITI indang academic programmes nungya IITians temi tesayur ama yariteptsü aser kaketshir temi pei jangraba ama results angütsü atema renemba nung lenmang sayutsü.

NITI Nagaland yagi repeater kaketshir nem competitive examinations nung nungdakba lenmang sayua subject nung rangloker lesson tem sayutsü.

Nagaland telungzüik nung temsüa aliba schools aser colleges tem shilem agütsü ayongzüiker. Principals aser tesayur temi iba osang ya temsüa aliba kekeshir aser tsürabortem den lemsateptsü ayongzüiker. Takok anguba kaketshir aser senpet angur nem December 2026 nung NITI Dimapur Centre nung Award Ceremony mapang senpet tem agütsütsü, ta NITI Academy, Nagaland ajanga ashi.

Radio nung Ao osang azüngertem nem tesayuba agütsü



Akashvani Kohima nung Ao osang azüngertem aser Ao Riju nung Coordinator & Publicity Head Wb.I.Temjen Tzüdir(abelen nungi pezübuba) parnok külemi tangokba noksa angur.

Mokokchung, Rongjui/September 01 (TYO): Akashvani Kohima nung India's Public Service Broadcaster, National Academy of Broadcasting & Multimedia, Delhi ajanga ayongzüka "Voice Culture & Language articulation" nung ajemdaker osang azüngertem nem tesayuba agütsüba sentong ka Luroi 28 aser 29 nü agiogo.

Iba tesayuba sentong ya Angami, Ao, Chakhesang, Pochury, Sumi, Kuki Rengma, Lotha, Sangtam, Yimkhiong, Konyak, Phom Kkiamniungan,

Chang aser Zeliang oshi agi Akashvani Kohima nung osang azüngertem asoshi agia liasü.

Osang azüngertemi pei oshi nung osang azüngba ajanga osang angartemi temelungsüa angatsü aser osang jangja-jangja-a angatettsüsa ola-osü timi adoka azüngtsü aser iba denji ano pei kin oshi oben jung junga meteta alitsü tesayuba agüja liasü.

Asen Ao oshi nung osang azüngertem nema iba tesayuba ya Ao Riju nung Coordinator & Publicity Head Wb.I.Temjen Tzüdir-i agüja liasü.

SC-i NEET paper leak asüba atema longkak aiter anema benokba FIR ajak agintsü

New Delhi, Rongjui/September 1 (Agencies): Cockroach Janata Party (CJP)-i anir July ita longkak aitba dak sendakba nung linük kübok tesem balala nung first information reports (FIR) benoka aliba ajak Supreme Court-i Mongolbarnü agintsüogo. Supreme Court-i Constitution kübok Article 142 nung parnok nem tashi agüja aliba amshia iba jenjang agiogo.

Centre-i, parnok anema criminal ken o benoka aliba aser soseta asür kinungertem nem compensation agütsütsü tenangzükba agütsüba sülen iba telok yagi September 5 nü Delhi nung longkak aittsü sentong yanglur aliba thiogo.

Chief Justice of India Surya Kant aser justices Joymalya Bagchi o V Mohana nungeri kümtetba bench yagi ashiba agi, iba telemtetba agiba ajanga criminal ken o tem agi longkak aitba nung shilem agiba kaketshirtem mesüra lanurtem timtemtsü aliba nungi kümzüksü, aser longkak aitba sentong ka nung shilem agiba yabo penal law kübok aibelen ka ama mezüngshitsüla.

Okadaki, July 20 nungi 25 tsüngda state aser Union territory balala nung longkak aiba dak sendakba nung parnoki tsüngdangi formally bener maruba FIR densema FIR benoka aliba ajak agintsütsü tetuyuba agütsüogo, aser item ken o tem ya bushisüdanga maotsü aser teshibang ama agitsü, ta shiogo.

SC-isa, ibala mesükba FIR kwi tanga state aser Union territory tem nung bangdaka ali, item ajak ya agintsütsü asoshi tetuyuba agütsüogo. "Kasa tatalokba dak sendakba nung FIR kecha mezüngoksemtsü," ta okadak tetuyuba nung shia lir.

Delhi Police ajanga Centre sorkar, Maharashtra, Assam, Bihar aser West Bengal sorkartemi criminal ken o tem agintsü asoshi benokba sülen tang iba tetuyuba ya agütsüogo.

Centre-i SC dang, July 25 nü longkak aitba telok nungi

lenirtem den senden amenba sülen takhangba asem agütsüba ataloktsütsü asoshi bendanga agütsür lir, ta ashi. Tenangzükba asem ya July 20 aser 25 tsüngda benoker aliba FIR tem agintsü, tatalokba balala dak sendakba nung FIR tasen mebenoktsü aser NEET tatidang agütsür shirnok soseta süogo parnok kinungertem nem compensation agütsütsüba lir.

Solicitor general Tushar Mehta-i ashiba agi, tenangzükba asemprongla ataloktsütsü atema sorkar bendanga agütsür lir, saka taoba mapang ozüng alema inyaksangshiba nung densema alirtem anema jenjang agitsü atema temelaba meshiogo.

SC-i, taoba mapang ozüng alema inyaksangshiba nung sendaka aliba nisung 2,837 shirnok longkak aitba tesemi oa liasü, parnok ya mejeta bushisüngdangtsü asoshi mulunga agizükogo. Police-i, item nisungtem anema FIR ka benoktsü asoshi temelaba meshiogo. Okadaki ashiba agi, item nisung 2,837 dak sendakba ken o ya balaka asadangtsü akok ta shiogo, saka iba ya longkak aitertem nem taitok agütsüba den memeyokteptsüla, ta ashi.

Centre-i parnok tenangzükba mataloktsü ta shia CJP-i September 5 nü India Gate nungi Delhi Police headquarters tashi longkak aita aotsü sentong ayongzükba sangdongba sülen tang SC-i iba jenjang ya agiogo. Criminal ken o tem ajak agintsüba ya iba telok takhangba tongtiband rongnung ka liasü.

Mehta-i bench dang ashiba agi, sorkari parnoki nangzükba mataloktsü ta bilemba ajanga September 5 nü longkak aittsü sangdonga liasü. "Onoki application benokatokogo anungji CJP representatives dang September 5 nü longkak aitsü atema ayongzüker aliba ya agintsü mepeshir," ta solicitor general yagi ashi.

CJP co-convener Saurav Das shiba okadak densema

liasü, pai longkak aittsü asoshi sentong yanglur aliba aginba metetdakja liasü.

SC-i ashiba agi, parnoki longkak aitertem kümzüka ayutsü atema meranga aruogo, shirnok pei tebilemtsü lemsateptsü atema iba longkak aiba sentong nung shilem agia liasü.

Kasa mapang nung Centre-i, 2026 NEET tatidang ken o dak sendakba nung soseta asür kinungertem nem compensation agütsütsü nangzükba ama inyaktsü ta nenshia metetdaktsüogo. Mehta-i SC dang, inyakyim tapet ka benoktsü atema sorkari ita asembo nüngdaksü, kechiyong ken o ya competitive tatidang ishika dak sendaka lir, ta ashi.

Okakdaki Centre dang compensation agütsütsü asoshi state tem den angatettepa pan-India policy framework ya yanglur sangdongtsü tetuyuba agütsüogo. SC-isa, 2026 NEET paper leak asüba ken o nung soseta asüba kinungertem dang policy ya sangdongba sülen compensation ya agütsütsü ta shiogo.

National tatidangtem nung inyakyim meshidakba aser mapangshia paper leak asüba anema CJP-i anir July 20 nü Delhi nung longkak aitba mapang Delhi Police aser Rapid Action Force nati longkak aitertem dak süng agi azükba, tear gas khaloktsüba aser pellet guns amshiba sülen longkak aitertem aser security personnel tem tsüngda mepetmesü adoka liasü.

Longkak aitertemi ashiba agi, sepaitemi parnok tashi alia benshi, aser kasa mapang nung ketdangsürtemi ashiba agi, longkak aitertemi police anema jenjang agi aser public property tem raksaja liasü.

Supreme Court-i taoba mapang, July 20 nü tatalokba bushisüngdangtsü atema taoba Supreme Court judge Justice R Subhash Reddy tekola ser züngsem pongu agi kümtetba high-powered enquiry committee ka tentetja liasü.

MULUNGZEN OLA

"Ni rara tajung raraogo, ni alizung tonga asemogo, ni tamangji yuogo." 2 Timoti 4:7

17-03-1941



23-08-2026

ASUR IMMANENBA TZUDIR YIMJENKIMONG
(Rtd. P.A. to D.C. Mkg)

Asür Immanenba Tzudir, shirangba mapang aser akümüli wadang tempangba mapang tashi nung shirnok-isa sarasadem, nübu aser rongsen agi yariogo, nenok ajak dang pelaba lemsateper.
Nenok temeim aser aria bilemba yari ozü-i meyiba magütsütetaka, Tsüngremer talubo temoatsü ajanga na aser nenok kibongtem maneni moajang ta ozü sarasadem.

Temeim Chirnurtem, Semchirtem aser Kinungertem.

Tamil Nadu CM Vijay-i Mettur dam lapoktsüogo

New Delhi, Rongjui/september 1 (Agencies): Cauvery ayong nung tzu dak sendakba nung Karnataka den mangatettep adoker aliba mapang TamilNadu chief minister C Joseph Vijay-i, tajemtsü tzu agütsütsü aser Cauvery Delta nung Samba alu atema Mettur Dam nungi tzu chiochtsü tetuyuba agütsüogo. Pai Mongolbar anepdang Salem nung tzu chioka liasü.

Vijay-i ashiba agi, Cauvery ayong tzu amshitsü ya Cauvery Tribunal tetuyuba aser 2018 küm February 16 nü Supreme Court-i obendang agütsüba dak ajemdaker Tamil Nadu temeden lir. "Onoki kechi südir süaka onok indang temeden metoktsütsü. Tamil Nadu tangutsü tim kechi ali aji agitsü atema sorkari maneni jenjang agitsü," ta Vijay-i ashi.

August 17 nü Supreme Court-i Karnataka dang Tamil Nadu dangi tzu yoktsü aliba dak sendakba nung Cauvery Water Management Authority's (CWMA) tetuyuba sülen tashi anga anidaktsü tetuyuba agütsüogo.

CM Vijay indang office sangdong ka ajanga ashiba agi, Mettur Dam nungi yokba tzu ajak ya aluyimertem ajangzüchtsü atema amshitsü, aser Cauvery aser iba ayong

canal tem nungi tzu atsütsü atema electric motor tem amshiba densema temelaba makai tzu atsüba ajak nokdangtsü. Maneni pumping schemes kübok temelaba agüja aliba dak alia tzu atsürtem anema jenjang tapet agitsü, ta kasa sangdong ajanga metetdaktsü.

Mettur Dam nung tang tzu 54.452 TMC bendena lir. Dam nung tzu level 91.56 feet aser tzu 10,857 cusecs yimoka aiba mangaoka lir. Sorkari dam nung tzu atsüngdenba aser yimoka aiba kanga junga asadanga atatsü aser irrigation atema nüngdakba apir tzu mapang balala nung chiochtsü.

Agriculture & Farmers Welfare, Water Resources, aser Revenue & Disaster Management department tem dang tzu kanga junga achaayangtsü asoshi district administration tem den angatettepa inyaktsü tetuyuba agütsüogo.

Maneni inyakyim takok ngua benoka inyaktsü asoshi Water Resources, Revenue & Disaster Management departments, police aser TANGEDCO nungi ketdangsürtem densema joint team ka yoktsü. Iba team yagi ozüng alema tzu atsüa agiba nokdangtsü atema kanga junga meita atatsü.

PLI scheme anema Bank union tem September 11 nü longkak aittsü

New Delhi, Rongjui/September 1 (Agencies): United Forum of Bank Unions (UFBU)-i, hopta nung anogo pongu dang mapa inyaktsüba aser sorkar indang Performance Linked Incentive (PLI) scheme dak sendakba nung ken o mebeneteti aliba anema longkak aittsü ta metetdaktsüogo.

UFBU-i September 11 nü longkak aittsü aser iba sülen September 28 nungi 30 nü tashi longkak aittsü ta metetdaktsüogo. Parnok takhangbatem mataloktsüra October 26, 2026 nü nungi

tenzüka mapang telatet ka makai longkak aittsü ta union temisa metetdaktsüogo.

Iba lokti tentet nung AIBEA, AIBOC, NCBE, AIBOA, BEFI, INBOC aser INBEF densema lir. Item lokti tentettem ya public sector, private, foreign, regional rural aser cooperative banks kübok inyaktertem tenüng nung nokdakertem lir, ta union tem yagisa metetdaktsü.

Official sangdong ka ajanga ashiba agi, union tem yagi tongtiband takhangba pezü agütsüogo, kong hopta nung anogo pongu nü mapa

inyaktsüba, sorkar indang Performance Linked Incentive scheme agintsüba, sensaksem akaba sülen incentive scheme yanglushitsüba aser ken o bangdaka alibatem bentettsüba densema lir.

Bank nung inyaktertem anogo ponu mapa inyaktsü asoshi takhangba agütsüba ya küm aika bangdaker lir. Union temi ashiba agi, 2015 küm tanabuba aser pezübuba Honibarnü ya holiday asütsü ta sangdongba mapang bank temi iba ken o ya benoka liasü.

Ken o ya 2020 küm lapokshi

aser 2024 küm March 8 nü wage settlement nung sign süa bentet. Tenangzüktepba kübok bank nung inyaktertemi Hombarnü nungi Hokolbarnü tashi anogoshia minute 40 talila mapa inyaktsü mulunga agizük aser iba melena Honibar ajak holiday ta sangdongtsü takhangba agütsü.

Union temi ashiba agi, iba tenangzüktepba ya küm ana tejakdang Finance Ministry nem agütsüogo, saka tang tashi sorkari agizüka mali.

Parnoki ashiba agi, hopta nung anogo pongu mapa

inyakba ya Reserve Bank of India, LIC, GIC and NABARD nunger densena riju balala aser sorkar o nija rijutemi benoka inyakdar.

Union temisa, iba ajanga customer service mapang dak mekongshitsü, kechiyong employee temi Hombarnü nungi Hokolbarnü tashi mapang talila inyaktsü mulunga agizükogo, ta ashi.

Kasa mapang nung Union temi Performance Linked Incentive scheme indang ashishia arudar.

(Maneni tapak 8 nung...)



TIR YIMYIM YIMOBILE (EDITORIAL)

DIMAPUR WEDNESDAY, SEPTEMBER (RONGJUI) 02, 2026

Timtem aremtsüla

Asenok aikati taküm tajung aser takar-tulur kuma linür saka tajung aser takar-tulurji ayongayonga kümner. Ibaji alima nung nisung taküm ka lia aotsü asoshi Tsüngremi lateta toktsüba inyakyim anema lir. Aji oda, tanü asüng balaka asenok aikati asen chirnurtem tangar kidang lia azüngdang timtemba indang kanga süoki ia bilemer. Atangji, aji nisunger yimya, kechiyong pei chirnur tangar kidang timtema azüngba angashidangji tsürabur mulung shiranger. Ajisüaka, asenok tsüraburtemi angatettsüba kaji, asen kidang asüyonga asen tanurtem nem timtem memetetdaksüra, timtem memetetba aser majangshiba tanurji tajung makümtsü. Ibaji angatettsü atema shisakari ashiba agi, nisung ya tamasa tetsüng agi jaja aser tetsüng agi jajasang to ut rongdong nung jajatsü tenzük aser ut rongdong nung jajasang to gari nung mener senzü tenzük aser gari nung mener jajasang to tayimtsü nung ayimtsü tenzük. Aji oda, tetsüng agi jajasang nisung to kodang tayimtsü nungang senzütsü tenzük, pai timtema aruba mapang ajak to amadok aser timtema aruba mapangtem amadokdangji mapa inyaksü ajak amadok. Iba mapangjibo pa ket agi mapa inyaka taküm alitsü mekoki aküm, anungji tayimtsü nungang senzüa alisang to sensaker kümer gari nung senzütsüa mekoki aküm, anungji tetsüng agidang jajaa pa ket agi alu mapa inyaka taküm alitsü tenzük. Alima nung asenok nisung taküm ya yamaji timtema lia takar akümer aser takar kuma jangratema lia sensaker akümer ta longpet alonger. Ibaji asenokia asenok taküm jenjang den athishia kodang bilemdangdir, hau ta asütsüsa asenoki ajangshiba mapa aser mapangtem aika bilemtettsü. Yashiang asenok tokolak nung khu bener tetsüng agi dang jajaa liasü, saka tangbo asenok gari aser tayimtsü nung jajar. Iba jagi asenoki asen teka agi mapa inyaksü aaker aser mapa meinyaki ayongayonga alitsü bilemer. Kasaji asen tanurtem nema mapa inyakdaksütsübaaji parnok merenshir amai bilemer, anungji soruchioka mesüdaksür, süoshia meshitokdaksür aser chiyonger peisasa pei ausoa meshitokdaksür. Iba amaji intetba tanur ka jagi peisasa süngo yanglua mejembiteter aser peisasa sorcuhioka chiyongtsübaaji otsü maka. Asen tanurtem kodang iba ama mapa mashi aser meinyaktetba jenjang ka tongdir, parnok aser parnok chirnurtemji sensaker kümer tetsüng agi jajatsü mapang anasai arudagi ta bilemdi. Ibaji kodang asenoki angatetdir, asenoki asen tanurtemji tangar kidang timtema ayubaji parnok tajung aküm tetenzüker ta rajemtsü. Tanü asenok rongnunga takar tulur aika pi kidang kilia aliba aser timtema school azüngba purtem lir. Aji oda, asenokia anepalu mesütet aser tangar kidang timtema yutsütsübaaji maremer ta süra asenoki asen tanurtem ashiochtsür asütsü. Tsürabur kati pei tanurtem tajung kumdaksünüra, mezüngbuba teinyaksüji tanurtem dang timtem ajururtemang tajung akümer, anungji timtem aremang ta ashitsüla. Ajisüaka, iba ama tagitsü tajungshi o ashitsü melen, asenoki asen tanurtem shinga nema mezüngmeshi mesüdaksütsü aser timtem magütsüdaksütsü asoshiang lokti o kuma jembira, ibajibo asen temeim agi mim kumdaksür asütsü. Tanur shinga pei alidak pei sünütsü süa aliba ajanga tajung makümtsü aser teti aon tajung den dang tebok sünga chiyonga aya tzüra memetet aienba tanurtemjia tajung makümtsü. Tajung akümtsü asoshi tanur shiai ayatsüra metettsüla aser timtem tuoshi, makamait aser mezüngmeshiba tia ajangshitsüla. Iba jagi dang tanur ka tajung kuma yanglutettsü aser item tanurtemji tangar aya-tzüraa aliba tanurtem asoshi teyarir akümtsü.

OLEMSABANG

TSÜRAPOR MAPANG ANEMPONG MAPAREN

~ M.Meren Ex. Pastor Ungma

Kechisarina inyaksim ajak yimtsüng shia terara balala lir, yamaji Anempong maparen ya ajak kasabo masütsüa akok saka ni anguba aser benshia aruba tsürabur mapang Anempong kar tazüngertem den lemsateper.

TANUR ASODANG ANEMPONG

Kodang tanur tasen ka sodir asemnü agi tenung ajatsü aser tambur nisung tajung aser temoatsü aketba ka jar arua tenarongji anatsülen todaktsütsü aser kima tongshi nung anempong sungo koba dang AKHO-O ta ajar ibaji kongsang tila ka lepzüker kima tongshi nung alenloka ayutsü aser ibaji teroknü mesüra tetsür süra pungunü anempongtsü. Iba mapang nung kidangi ainer manikettsü aser chiyungtsü tasen kecha kidangi bener maitsü. Aser tebuu tesemnübuba tenarong atonü An tebong tajung ka kima tsüetsü aser azüji kima rükshia endoktsü aser shiji tzüin asotsü saka tetsüjibo iba shiji machitsü, aser teroknü mesüra pungunübubaji tebuji ayong kati aotsü aser tzü chikoa merüktettsü, yamaji kibungji meshitettsü. Saka anempong mabensadang tebuji aluleni ora tanü-talem, ansutsü tsünüa akaba leni maotsü kechiaser nuralikoji(tanur asoba anempong) kanga tesashi lir kechiaser anempong mabensadang tanu-talem inyakra ara atur ta jembir aser yamaji ataloker. Alima nung nisung tasen ka asobaji zübazüba bilema mesütsüba masü kechiaser ibaji nu menden nung Tsüngremi yangluba lir, anungji iba nisung tasenji kodang alimai arudir kanga anemponga meshiteta mesütsü nungdaker aji mesüra alima nung lia aodang temoatsü nung mainer aser arishia malir, anungji tsüraburi tanur tasen asodang yamaji anemponga aru.

NISUNG KA SÜATOKRA : Kodang nisung ka südir tebur süra anogo terok aser tetsür süra anogo pungu mangpanga mang yima alitsü. Sensaker asüdangbo tasünüjisa endoktsü saka arürleper aser takar süra anogo terok tashi tzüin sabang yanglur lepji idakji juketa ayutsü aser Nokhur kati amang-sangwa maka nüka alitsü, aser pa nem tsük ataktsütsü. Aser anogo teroknübuba nung Nokhurtemi mangji sabang nungi atsüzüka apur oa leper nung yutsütsü, aser leper nungji yoka terok songer idakji lepkiju juketa yutsütsü. Tanü asüngbo süng agi süngden yanglua idakji mangji shibanger saka akidangbo lepkiji yoka(Aou) agi aser süra agi yanglua idakji juoka ayur aser iba lepkiji yoka terok songa akaba nungji juloka yutsütsü ta yamaji benshia aru. Takar aser Arürleper asüdangbo Süchi benjung ama par kimaji longsua par naklo ken tena aser sükolak den pai leper aruba Arür-kolak koba dang Sakhu ta ajar ibaji amentena yur tsüngsanga longsuteptsü aser aji par kima menden teberi lar idakji yimsüsür menteper kimak ken tetezü par naklo ken tena ki amaktsü, iba kimak kensüji kanga dang tajemtsü keta akidang moatsü-Tsüngrem mong kensü ama masü kenyongi balaka nung kiji amaktsü aser iba mapang nung Asem olaji balaka nung atemtsü aser aji lepkhu mabensa tashi yamaji yimsüsürtemi longsutsütsü. Aser tetsür kenshi-oshir kar sen talang agi ar kima-yimtung ajak sema sü agi ali ajak arepa jepa par kenji tettsüle jeple ta yimtung ajak sema takar asüba mangji yimtsütsü aser iba dangji AJEP-AR ta ajar. Aser takar shirnoki Sü aser Nashi kentanga chir ali aser Nokinketer lir parnok asüdangbo Mangsü Nashi mesüa alibaji tepsettsü aser aji lepkhu memongzük tashi iba denji chiyunga amongtsü. Saka sensaker asüdangbo kecha takuma magitsü. Aser tasür kima dak alaka kidanger kima yoka tajem amshia mesüra yongsen mapa meinyaktsü, aji kidanger aser kiyonger asoshi anempong tulu lir. Ano potiri mesüra yimeri mangji apur aodang mangpur kari kiyonger mesüra yimer kar ki nüktang nung teka agi ametra pa dangji sen tulu achitsü kechiyong mangji kanga ANEMPONG lir. Ta yamaji ashibanga aru.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

South Korea Unification Church lenir küm ana tepuokdak ayutsü



Unification Church lenir Han Hak-ja wheelchair nung mener Seoul nung aliba Seoul Central District Court-i August 31 nü arudang tangokba noksa nung angur.

Seoul, Rongjui/September 01 (Agencies): Linük tir indang kinungtsü densema ketdangsür den süpokrem amshia senotsü agütsüba nung aika South Korea nung court kati tashi tulu aliba Unification Church indang tanishir ka küm ana tepuokdak ayutsü August 31, 2026 nü obendang agütsüogo.

Arishi küm 83 tain Han Hak-ja yagi Yoon Suk Yeol tir inyakba mapang pa kinungtsü Kim Keon Hee nem parnok bhukuma sentong yangludaktsütsü meranga designer handbag ka densema jenjang tulu aketba osettem agütsü ta tai tonglokja liasü.

August 31 nü la okadaki wheelchair nung mener hospital pyjamas aser surgical mask inoker teyariteper temi meketbanger aru, kong prosecutors temi küm 13 tepuokdak ayutsü onük benoka liasü.

Unification Church ya media, education aser chiyongtsü lemtsüba densema shishilempaba maparen jenti inyaker aser South Korea nung yimtenren tsütsü tesendaktep aliba indang mapang talangka nungi tenük yoka aru.

Arogo-i sangdong ka nung iba obendang ya jembishitsü nangzük aser court obendang magizükteter ta ashi.

"Han-i item mapa inyaktsü tetuyuba agütsü mesüra ozüng alema item mapa inyakba lai meteta aser agizük ta tanü court ajanga bushitetba onoki magizüker," ta Unification Church ajanga Hombarnü ashi. Ano tanga tai tongloktüba nung Han-i taoba mapang ozüng yanglur tejangja Kweon Seondong nem ozüng alema senotsü agütsüba densema lir, shiba süpokrem agiba mechi tang tepuokdak yua lir.

Seoul Central District Court ajanga la küm ana tepuokdak ayutsü obendang agütsüba onoki jangjaogo, ta Unification Church odongtar kati osangbener dang ashi.

"La ya Unification Church nung tematiba menden nung lir, aser la jenjang aser mapa asadanger tepuokdak ayutsüba ya mepaidoktet," ta court-i obendang nung ashi.

Unification Church ya Han künungbo asür Moon Sunmyung-i 1954 küm tenzük aser Moon ya Second Coming of Jesus Christ ta züngshiba mechi

mangatettep nung mapang talangka nungi lia arur.

Han ya arogo züngsem temi "True Mother" ta züngshir aser 2012 küm Moon asüba sülen arogo lenisüba menden nung la amen. Taoba first lady densema süpokrem ken o ka nunga la September 2025 nung pua liasü.

Unification Church nungya lokti kiyimba sentong agir, kong linük balala nungi apuani ajurutepdaktsür aser sentong ya South Korea nung par headquarters nung agir.

Han apuba ajanga arogo anokshitsü, kong alima tesem balala nung züngsem million ter lir ta ashir.

La apuba sülen Han ya aiben detention centre ka nungi temang anepalutsü atema mozü kidangi tanen makai belenshia

liasü.

Obendang agütsüba sülen la mozü kidangi meyipa ao, kong court obendang ama temang majungba mechi Bodhbarnü tashi amungtsü. Han ya temulungjang tashidak, alangba ajanga temang angoba aser glaucoma treatment agiba mapang lir.

"La mozü kidang mapang apuloka amungtsü atema lar okatsür temi la temang repranger jembitsü," ta arogo odongtari ashi.

Japan nunga 2022 küm taoba ato kilonser Shinzo Abe khasetba sülen iba arogo dak asendenshir tenük yoka liasü, kechiaser Abe khasetsang-i par kibong senotsü jenjang mejungi akumba atema iba arogo tenüng sena liasü.

ANO GO ABEN TSÜNGREM DEN

Tekülemi azüokdaktsür

"O nisung, kechi tajung pai ne dang sayuogo; aser ochishia inyaktsü, aser yimlibilem meimtsü, aser ne Tsüngrem den ajemalua jajatsüba dak alema ano Kibubai na nungi kechi akanger"

(Mika 6:8).

Mika ainkari tekülem yimya tangatetbaji tema tereprangtsü ka ama masütsüla ta ashir. Saka tekülem yimya nungji asen temulungjang yimya yimko aser jaklaliro nungji Tsüngrem metetdaktsütsüla. Asen teka nung aliba tenlabaji masü saka asen taküm ajunga agi tanela aser atangji nung külemtsüla. Tanü lokti nung teka mapa - tepang o aser temulungjang na kenyongi balala asüba nisung aika angutsü.

Tsüngrem nükjidong aser nükla ka nung tekülembaji melira, aseni Pa o bushiba, azüngba, sarasademba, külemi telongjem akaba ajakji tema tereprangtsü ka dang asutsü. Asen mulungjangji Tsüngrem den shitak melira, tema nung inyakba ajungaji shitak masütsü. Tsüngrem den tesendaktep shitak lia tekülem nükjidong meteta külemra asen mapa ajak nung azükarutsü. Asen tekülem jagi taküm azüoker aser asen taküm libaliro yimya ajak agi Pa sentsü wangshidaktsür.

Goa nung anti-conversion bill benoktsü sentong agiener



Goa state y i m t i b a , Panaji/Panjim nung tekülem ki tejentiba Our Lady of the Immaculate Conception Church reprangi nisungtem arua aliba noksa nung angur.

Panaji, Rongjui/September 01 (Agencies): Goa nung Hindu bhukumba Bharatiya Janata Party (BJP) sorkari tang temendak State Assembly session nung anti-conversion bill mebenoktsü telemtetba agiba atema arogo lenirtem, Catholic nung ozüng yanglurtem aser activists temi pela agizüker saka iba bill meshi-meshia agientsü akhanger.

Goa Prohibition of Unlawful Conversion of Religion Bill, 2026 ya state cabinet-i taoba hopta agizüka lir aser August 31 nungi tenzüka anogo asem monsoon session mapang züngsem 40 aliba State Assembly nung benoktsü liasü.

Chief Minister Pramod Sawant-i iba telemtetba ya BJP nung Catholic nung ozüng yanglur Michael Lobo aser Delilah Lobo aser independent legislator Aleixo Reginaldo Lourenco nung dang session mezüng anogo metetdaktsü ta

ashir.

Lourenco ya Catholic nung aser BJP aniba sorkar bhukumer, aser pai ashiba agi, chief minister-i parnok dang tang session nung iba bill mebenoktsü metetdaktsü.

"Sorkari ibaji benokra ni anema nokdaktsü," ta Lourenco-i osangbener dang ashi.

Goa nung iba ama ozüng menügdaker, kechiaser state nung tashiyim amshia tamangba yimsü melendaktsüba otsü sorkar indang data nung mesayur, ta pai ashi.

Archdiocese of Goa's Council for Social Justice and Peace indang executive secretary Father Savio Fernandes-i iba bill ya nüngdak maka ta ashi aser meshi-meshia agientsü takhangba agütsü.

"Lokti tentet balala nungi ola adokba aser state elections tonga arur asüba yong sorkari

atsüngzüka aor," ta pai UCA News dang September 1 nü ashi.

Opposition Congress ozüng yanglur Carlos Alvares Ferreira-i ashiba agi, bill ya khen atema 'cold storage' nung yua lir aser taruba küm tetenzüklen elections agitsü aliba nung BJP-i maneni takok ngura iba bill ya benoktsü.

"Iba bill ya August 31 atema Assembly indang agenda nung dena liasü, saka soita ayu asü mesüra meshi-meshia agienar memetetdaktsü indok," ta pai ashi.

BJP-i elections atongtsü anasa voters timba nüngdaker ta angateta arudang iba ama communalist agenda ya benoker, ta taoba mapang Goa indang Advocate General inyaka alisang Ferreira-i ashi.

"Ajisüaka Goa nung aliba nüburtemi BJP indang 'communal hate bait' nung kodanga memeteptsü," ta pai

ashi.

Iba bill ya BJP indang national political template nung shilem ka ama kuli tejangja makai tendangtsüba liasü, ta taoba mapang sorkar ketdangsür inyaka alir Elvis Gomes-i ashi.

"Iba jagi tangatetba shitak aliba Goa nüburtemi magizük, shirnoki secular fabric aser loktiliba- tamangba yimsü tesendaktep akhümtsübur," ta pai ashi.

The Catholic Association of Goa tir Cyril Fernandes-ia sorkar telemtetba pelashishia agizük saka ibai khen atema dang asütsü akok ta ashi.

All India Catholic Union odongtar John Dayal-i ashiba agi, ibai tasa ka dang lir aser ruling party-i iba bill kodanga mebushitsü ta temulung malemstsüla.

"Taoba mapanga bills tem khen asoshi cold storage nung yur party tanaben yimsüsüba mendeni aruba sülen amshiba asenoki nguogo," ta pai ashi.

Küm tetenzüklen Assembly nung benokba sorkar indang data ajanga ashiba agi, Goa nung 2022 aser 2023 tsüngta ozüng alema tamangba yimsü melenba mesüra melendaktsütsü merangba ken o pezü liasü. 2024 nungibo iba ama atalokba mali.

Goa nütsüng yongsük 1.5 million aliba nungi Catholic nung shilem 25 aser Hindu nung shilem 70 ta data ajanga sayur.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Zütsü

(n) tip maketba ayong ngo tulu tapu ka (river whale)

* Zütsü ngo ya asenokibo kanga ashibanga achir.

Zütsük

(n) angó aputsü aoshi ang agi yangluba oset (fishing net)

* Ayong nung angó aputsü atema zütsük dang amshitsüla.

OLONG PAITEP # 7637

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPIEN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioxtür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7636 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.


LANGTSÜNGLEN :

1. Tenükjang, 2. Luden, 3. Kioxtsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER

Guinness World Record aika angur David Rush-i "most toilet paper rolls balanced on the head" otsü tasen yangluogo.

David Rush-i Guinness World Records titles 200 tema yangluteta lir aser pai mezüing 2021 nung toilet paper rolls 101 tashi pa tekolak nung yuteta otsü tasen yanglua liasü saka ano paisa 254 rolls yutetba ajanga iba otsüji ajateta tasen ka yangluogo.

Naga MLA temi Deputy CM Kipgen aser la kinungbo anema noktaker

Imphal, September 1, 2026

(Agencies): Manipur Deputy Chief Minister Losii Dikho aser Naga MLA aikati Union Home Minister Amit Shah dang Kuki telungpur lennir ka aputsü aser Deputy Chief Minister Nemcha Kipgen merenshitsü takhangba agütsüogo.

Deputy Chief Minister Dikho dena Naga MLA 9-i Kuki National Front-Progressive (KNF-P) chairman Thangboi Kipgen aputsü atema Union Home Minister dangi shidi

züluogo. Pa ya Deputy CM Nemcha Kipgen kinungbo lir ta parnokishi ashi.

Nemcha Kipgen'er office-i lar kinungbo'er KNF-P telok den yariteper. Anungji la ozüing tapet agi merenshitsüla ta Naga MLA temi shidi nung shia lir.

Parnokisa Kuki telungpur telok ajak den Suspension of Operations (SoO) agreement agientsü takhangba agütsüogo. Kuki telungpur teloktemi iba tenangzüktep anema inyaker aser civilians amaker

ta Naga MLA temi ashi.

August 27 nü IT Road amakdang Naga civilian pezü khaset. Jawaharlal Nehru Institute of Medical Sciences, Imphal indang mortuary nungi tesüiba nung tepsetba tasümantem ano magizük lia iba lendong atalokogo ta parnokisa metetdaksüogo.

April 18 nü TM Kasom nung National Highway-202 nung amakdang Naga nunger ana khaset ta Naga MLA temisa ashi.

August 14 nü Langka Village amakdang Naga nunger aluyimer ana tepset aser yimtsüing rongdoksü ta parnokisa ashi.

Manipur sorkari mapa meinyakra sorkar pusema nungittsü kuli kecha mali kümogo. Manipur nung alirtem kümzüka ayutsü aser taginübatem asoshi onoki mapa balala inyaktüsü akümtsü ta Naga MLA temisa ashi.

Züngsem 60 agi akümba Manipur Legislative Assembly nung Naga MLA 9 lir aser menden 19 tashi Scheduled Tribes atema reserved lir.

BJP central leadership-i dang tatembang lemtet agitsü: AL Hek

Shillong, September 1, 2026

(Agencies): United Democratic Party (UDP) aser Trinamool Congress (TMC) MLA temi Meghalaya BJP nung adentsü atema kishi lapoka dang lir saka BJP national leadership-i dang lemtet agitsü ta Alexander Laloo Hek-i ashi.

Meghalaya nung UDP MLAs 12 aser TMC MLA kari BJP nung adentsü bilemer ta osangtem prokshiba mapang Hek-i iba olen lemsatepogo.

Meghalaya nung BJP MLA ana lir aser parnokishi UDP den külemi National People's Party

(NPP)-i aniba teloktep nung adener. Külen, TMC ya Opposition nung amener.

State BJP-i iba atema tatembang lemtet agitsü tashi mali aser Delhi nung party leadership-i dang lemtet agitsü ta Hek-isa ashi.

"Hao, tesüiba nung iba onük atema sendentem menogo saka iba ya national leaders ajanga inyakba liasü. Lemtet ajak state BJP ajanga masü Delhi leadership-i dang agitsü" ta pai ashi.

"BJP-i kishi lapoka dang lir. Onoki Meghalaya nung 2028

(assembly election) nung BJP-i aniba sorkar ka akümtsü tebilemba lir" ta Hek-isa shisem.

"Onoki parnok pelashishia agizütsü. BJP indang kishi teti lapoka dang ayutsü. Onoki state renloktsü, healthm, education renloktsü atema akokba tashi inyaktüsü" ta paisa metetdaksü.

"Onok Meghalaya Democratic Alliance (MDA) sorkar nung dena lir saka onok shia pei pei political party atema inyaker aser tangar atema kecha ashitsü makok" ta Hek-i ashi.

NFR-i Hill Section nung Train Services melenshir

Dimapur, September 1, 2026

(TYO): Northeast Frontier Railway (NFR)-i Lumding-Badarpur Hill Section nung train services melenshiba metetdaksüogo.

Cancellation of Trains:

Train No. 15617 (Guwahati-Dullabcherra) Express - 02.09.2026 nü apusotsü aliba

athir.

Train No. 15618 (Dullabcherra-Guwahati) Express - 03.09.2026 nü apusotsü aliba athir.

Train No. 15615 (Guwahati-Silchar) Express - 02.09.2026 nü apusotsü aliba athir.

Train No. 15616 (Silchar-Guwahati) - 03.09.2026 nü

apusotsü aliba athir.

Rescheduling of Trains:

Train No. 15650 (Narangi-Agartala) Express - 02.09.2026 nü Narangi nungi 18:30 hrs nung apusotsü.

Train No. 15646 (Silchar - Charlapalli) Express - 02.09.2026 nü Silchar nungi 22:10 hrs nung apusotsü.

Film Expo India nung Hello Meghalaya stall wangshiogo

Guwahati, September 1, 2026

(Agencies): Bharat Mandapam, New Delhi nung Film Expo India alidang 'Hello Meghalaya' ta ser stall ka ajanga Meghalaya indang creative aser digital economy sayuogo.

Meghalaya ya filming destination ka dang masü saka storytelling, filmmaking aser creative talent indang tongti tesem ka akümer ta parnokishi

sayuogo.

'Hello Meghalaya' stall-i filmmakers, actors, industry professionals aser Bollywood representatives dak alia technology aser artificial intelligence innovators arua liasü.

'Hello Meghalaya' stall lapoker mezüing anogo nung nisung 300 shi aru aser filmmakers o actors-i Meghalaya nung future productions lenmang

bushitsü aser local creative talent den külemi inyaktüsü tejangraba lemsatepa liasü.

Meghalaya-i national platform nung shilem agiba atema tenüngsang agütsür ta actor Vindu Dara Singh-i ashi.

Pushpa film nung associate director Nixon D'Cruz-ia Meghalaya nung tarutsü creative opportunities bushiteptsü tejangraba metetdaksü.

Nepal tzümetsüng lendong nung asür nisung 1,000 alemogo

Kathmandu, Rongjui/September 01 (Agencies): Tibet den arütsü nung tzümetsüng lendong ajanga Nepal nung nisung asüba 1,000 alemogo, ta linük indang disaster agency ajanga ashi.

Nisung 3,900 dak tema samar bushir aser item rongnung nisung 600 dak tema Trishuli River nung hydropower tesemtem nung molushi agi sünger aliba longpok nung lir ta amanger.

Engineers temi longpok tem nung mopung inokja arur aser team kati longpok ka telungi yitet saka yangji nisung kata monguteti meyipa adok.

Tzümetsüng aser lishi agi nembanger aliba hydro projects tem nungi nisung 279 kumzükogo ta Nepal Ato Kilonser Balendra Shah-i Hombarnü ashi.

Rescue operation ya China aser Nepal mitkar temi kumtetba international team temi anir inyaker, aser yangji India, Korea aser Australia

nungi takotet nisungtem dena lir. Nepal ya hydropower nung metaloka alir aser tenemlen ayong nung iba projects ya küm aika yanglua aru. Renemer aliba mesür tang teyangludak projects 11 iba tzümetsüng agi raksatsüogo, ta ketdangsür temi ashir.

Longpok telungi mopung yokba ya hopta tatemlen tenzük, saka longpok nungi temai madokteti aliba kinunger temi iba mapa ya tekeraba nung tenzükla asü ta ashir.

Rescue operations tesashiba kumogo aser tzümetsüng ya tangalen ama masü, ta Nepal Ato Kilonser Shah-i ashi.

"Tzü-mopung melenba ajanga Himalayan region nung asenoki lendong tali ajurur. Iba tebilemtsü alima nem angatetdaksütsü mapang tongogo," ta Shah-i Hombar aonung Facebook post ka nung ashi.

Tang tashinung nguteta aliba nisung tasümang 900

nungi shilem 4 dang jangjatetogo, ta Ministry of Health nungi odongtar kati ashi.

Tzümetsüng agi mezüng kongshiba Chitwan district nung leper tasen yanglua nisung tasümang aremer, kong ayongkum leni nisung tasümang 300 jungnüa bener aruja liasü.

Nisung temang ashiba tezüknem agi sünger ketdangsürtem Personal Protective Equipment (PPE) temesüng agir mejangjaba tasümang trucks nung inoker aremtsü bener aor.

Hopta tatemlen yimti tezülen arem shilem tuluka tuteta leper yanglu aser Medical staff aser volunteers temi mejangjaba tasümang nungi DNA agizüker.

Tibet tsütsü kasa lendong nung nisung 16 asü aser nisung 546 samar bushiba mapang lir, ta Chinese state media ajanga ashi. China nung tzümetsüng noksa khenyongi mamshidaksür.

Office of the

Longsa Yimsoshir Zünga

H.Q: Longsa Village, Mokokchung

TENÜNGSANG AGÜTSÜR

Zünger jala jabasotem NPSC nung takok anguba tenüngsang agüja pelaba lemsateper.

1. Temsülemba (SDO Power)
S/o Lt. Mr. Supongmayu & Mrs. Moanaro.

2. Wapangtemjen (Inspector Industry),
S/o Lt. Mr. Supongmayu & Mrs. Moanaro.

3. Aosangla (Information Asst. Sect.),
D/o Mr. Imnalepzüng & Mrs. Ngangshipokla

4. Tsüktimongla (Pharmacist), D/o Mr. Pursanen & Mrs. Moasangla.
Tsüngremi nenok ajak pei wadang nung takok, temoatsü aser arishi moajang ta zünger tsüraburtemi sararademsür.

Sd/-
Meyisapong
President
Yimsoshir Zünga Longsa

Sd/-
Imkongmeren
G/Secy.
Yimsoshir Zünga Longsa

Adiala Jail dang Imran Khan kija tepuokdak mayutsü tuyur

Islamabad, Rongjui/September 01 (Agencies): Islamabad High Court-i Adiala Jail ketdangsürtem dang Pakistan Tehreek-e-Insaf (PTI) tentetsang aser taoba ato kilonser Imran Khan aser pa kinungtsü Bushra Bibi na tepuokdak kija (solitary confinement) mayutsü totuyuba agütsüogo aser kinungertem den ajuruteptsü, osangtsüsang agiteptsü, tazüngtsü material

aser medical care agütsü asoshi mera aika agütsü metetdaksü. Court-i Adiala Jail superintendent dang Imran Khan aser Bushra Bibi na prison rules nung aliba ama ajurutepdaksütsü totuyuba agütsü aser jail ozüngtem nung aliba ama Khan'er kinungertem pa den ajuruteptsü melatsü aser ano taoba ato kilonser aser par jabaso tem tsüngta telephone ajanga osang agitepdaksütsü ashi.

Ajisüaka yimtenren atema telephone ajanga jembishinüba recording süa amshira, telephone facility ya agientsü akok, ta court-i ashi. Khan'er jabaso tem ya bendang lima nung alir aser parnoki tebu den osangtsüsang tajungba nung agiteptettsü lenmangtem bushia arur.

Islamabad High Court-i jail ketdangsürtem dang Imran Khan nem anogoshi osang kakat tem aser tanga kakat tem agütsütsü, prison rules nung aliba ama medical facilities agütsütsü totuyuba agütsü. Adiala superintendent dang iba totuyuba shidak anidaksü aser iba osang anogo 15 tsüngta agütsütsü metetdaksü.

Khan aser pa kinungtsü tepuokdak yua aliba tensa mechi ita aika atsütepa aruba sülen iba obendang ya agütsü. Petitions ya Khan teyi Aleem Khan aser Bushra Bibi'er jala Mubashra Khawar Maneka nati benoka mapang talangka shinga dena majurutepdaksü, kinunger mesüra okatsür den ajuruteptsüa nokdanger ta aija liasü.

Jail ketdangsür aser sorkari item taitsüba magizüker aser tena ya technical tsütsü nungi solitary confinement nung masü ta ashir. Security mechi Khan ya balaka yua lir aser cell ka telung nung tanen makai ayuba masü saka cells balala aliba compound ka nung lir ta ketdangsür temi ashir. Kasaji Bushra ya security mechi balaka nung yua lir ta ashir.

Ajisüaka PTI-i itemji magizüker aser tena ya azüngmeyakdak tesem nung yua lir aser tenokdangba alakyia agütsür ta ashir.

Russia-i Ukraine yimtiba nung nisung 12 tepset



Kyiv, Rongjui/September 1 (Agencies): Russia-i missile aser drone agi Ukraine yimtiba Kyiv aser yimti temeket nung aliba tesemtem amakba sülen nisung 12 tepset aser nisung 21 yirutsüogo, ta ketdangsürtemi metetdaksü.

"Kyiv aser temeket Russia-i missile aser drone amshia kanga sashia makogo," ta Kyiv regional military administration tekolakba Tymur Tkachenko-i Mongolbarnü Telegram ajanga ashi.

Tir Volodymyr Zelenskyy-i, Russia-i kiralongrar mapa inyakba ya aitsüogo aser ashiba agi, asürtem rongnung India nunger ka densema liasü. Paisa, parnok nem teyari agütsürtem dang Ukraine indang air defence akangshitsütsü atema ayongzükogo.

Kyiv Mayor Vitali Klitschko-i ashiba agi, drone aser missile agi yimti amakba sülen nisung ti tepsetogo aser tanur ana densema nisung pongu yiruogo.

Ano Kyiv temeket nung nisung pezü tepsetogo, ta Ukraine nunger prosecutor temi

metetdaksüba den, Boryspil tesem nung nisung aliba ki ka raksa liasü, ta shisem.

Zelenskyy-i ashiba agi, Boryspil nung iba ki nungi nisung 50 aninogo.

"Russia-i takok tashi nüburtem tepsettsü atema sentong yanglur jenjang agir, aser air defence agi anünga aliba mapang dang parnoki takok ngua jenjang agiteter," ta pai social media ajanga ashi.

Kasa mapang nung Russia indang Ministry of Defence-i ashiba agi, parnoki Kyiv aser Odesa nung aser item yimtitem meketa aliba tesemtem nung military aser energy facility tem makogo.

Ukraine indang border service-ia, Russia nunger sepaitemi Romania den arrtsü nung Orlivka tesem nung ferry checkpoint ka makogo, ta ashi.

Ukraine indang air force otongdar Yuriy Ihnat-i ashiba agi, Russia-i tang yokba drone tem ya khazüka yoktsü asoshi tasakba lir. Taoba anogo trok tsüngda jet-powered drone 2,800 Ukraine-i yokogo aser

item rongnungi shilem 60 dang khadangteta liasü.

Kyiv nungi Al Jazeera osangbener Audrey MacAlpine-i ashiba agi, Russia-i anüngdang tanen makai drone tem yokba ya nüburtem anogoshia inyakyim nung tetsükdaksü adokaksütsü atema lir.

"Air raid siren agütsüba shia nüburtem commercial ki kar aser school tem toktsür ali telung nung tejenokdaki aotsüsa akümer. Ukraine nung choyongtsü rizünga ayuba tesem shilem 90 ko raksatokogo, anungji chiyongtsü ayokba tesemtem nung supply tajemba kümogo," ta MacAlpine-i ashi.

Russia nunga Ukraine-i drone amshia Ust-Luga nung rongnendak amakba sülen mi adoka liasü. Iba rongnendak ya northwest nung export asüba tongtimbang tesem ka lir.

Samara tesem nung Ukraine indang drone ka agi Novokuibyshevsk jila amakba sülen apartment ki ka nung kichibatem raksa liasü, ta Governor Vyacheslav Fedorishchev-i Telegram ajanga metetdaksü.

Novokuibyshevsk aser Volga ayong temeket nung aliba tesemtem nung state oil company Rosneft meyong Russia indang totzü asüngtetdak tongtimbang aika amenoka lir, aser iba tesem ya Ukraine-i aiben maka arudar.

Russia kübok Belgorod indang acting governor-i ashiba agi, Ukraine-i iba tesem amakba

mapang nisung ka tepsetogo.

Russia aser Ukraine napronglai parnoki civilian tem dak rangloker jenjang kecha magir ta shia arudar.

Maneni Ukraine indang Drone Forces commander-i ashiba agi, parnoki August ita Russia indang "shadow fleet" nung rong 54 makogo. Ukraine rara nung amshitsü atema Russia-i ozüng alema totzü ayokba nokdangtsü atema parnoki iba jenjang agiogo, ta commander-isa shisem.

Ukraine indang air defence tem akangshitsütsü atema sensaksemtsü asoshi European Union defence aser foreign minister tem Ireland nung adenshir aliba mapang tang Kyiv aser temeket nung tesemtem makogo.

Ukraine tang interceptor missile tem agi anünger aser talisa United States nung yangluba Patriot systems agi kanga anüngba mapang ka lir, koba ballistic missile tem khadangtsü asoshi kanga tongtimbang lir.

Ita ishika tsüngda linük anapronglai kati ka tali maktepa arudar. Parnoki warehouse, business aser totzü o port facility tem amakba den rongtema makdar aser iba mapang civilian tem asüba tali küma odar.

US teyongtsüi ia yimjung atema sensaksema aruba bangdaker aliba mapang tang linük ana anogoshia amaki kati ka maktepa arudar. Iran den rara tenzükba sülen US-i yimjung atema sensaksem nung shilem magi-i arudar.

Mon nung 48buba Inter District & State Badminton C'ship tenzükogo



Dimapur, Rongjui/September 1 (TYO): Mon Town kümteter küm 75 ajungba küm Mon District Badminton Association-i ayongzüka 48buba Inter District & State Badminton Championship 2026 September 1 nü tenzükogo. Iba asayamung ya September 4 nü tashi asayatsü.

Mongolbarnü Main Indoor Stadium Mon nung asayamung lapokba sentong nung Advisor to CM, Chairman IDAN, Secretary General Nagaland Olympic Association aser Nagaland Athletic Association tir Abu Metha alakteta jaoker liasü.

Sentong nung o jembiba mapang Abu Metha-i, 48buba Inter District & State Badminton Championship 2026 ayongzüka asayaba atema Mon District Badminton Association aser Mon nung aliba nüburtem nem tenüngsang agüja liasü. Paisa, iba sentong nung pa densemba atema kanga pelaba

lemsatop aser iba ya maongka tajung ka ta ashi.

Parnoki bendanga agüja meranga inyakba atema tenüngsang jembiba mapang Metha-i, Mon amala kinük nung aliba tesem ka nung iba amala sentong ayongzüksü ya temela masü ta ashiba den, iba amala sentong ayongzüksü ya state tenzükba nung shilem ka lir ta shisem.

Metha-isa asayar ajak nem tenüngsang agütsü aser parnok dang yimayimpong azüoka, bendanga agüja aser mapang shitak amshia asayatsü ajungshi. Asaya ka asayatsü asoshi meranga inyaksüla aser iba atema shortcut, back door appointment aser recommendation kecha menügdaker ta shia pai lanur asayartem dang asaya nung takok angutsü atema takok tashi meranga inyaksü ajungshi. Saisabong yagi state aser linük tenzüksü aser asen nüburtem

nemadangdaksütsü atema sabang ka agütsür, ta paisa shisem.

Maneni Metha-i, iba asayamung ya temaba jenjang tongtetsü atema tajemdakdak long ka asütsü aser iba ajanga nüburtem longjemdaksütsü imlaba lemsatop. Pai, asayartem dang state nung yimjung aser telongjem atema parnok ajak ya ambassador kaka akümtsü mepeshi.

Sentong nungsa pai 48buba Inter District & State Badminton Championship 2026 open lapokba sangdonga liasü.

Asayamung lapokba sentong ya Eji Wangnyu lenisüba nung agi aser DC Mon, Wennyei Konyak-i lokti pela agizükba o jembiba, shiba Planning Convenor & Sr. Vice President NBA lir. Sentong nungsa KBCM Pastor, Rev. H. Moba-i Tsüngrem temaotsü meshizüka sarasadem aser tetsür telok kati ken tajung ka tena liasü.

US Open: Alcaraz aser Sabalenka nati pei tata asaya kokogo

Rongjui/September 1, 2026 (Agencies): US Open tebur kija asaya nung Hombarnü Defending champion Carlos Alcaraz-i, Russia nunger asayar Roman Safiullin straight sets nung koka tanabuba round-i iogo. Pa yiruba ajanga ita pezü masayai lir tang mezüngbuba asaya nung shilem agiogo.

Alcaraz, shiba tekanük yiruba ajanga April ita nungi masayai liasü, pai Arthur Ashe Stadium nung iba asaya 6-4, 6-4, 6-4 agi kokogo. Tetsürtem rongnung defending champion Aryna Sabalenka-a tanabuba round-i iogo.

January ita Australian Open koka career Grand Slam akokba asayar tanobusang akümba sülen Alcaraz ano Grand Slam ka koker küm tembangtsü nükjidong nung asayadar.

Hombarnü asaya nung Alcaraz-i taoba mapang ama kanga jungabo masayatet, saka

asayayonga aoba mapang pa indang forehand tashi taitba kuma ao aser net nunga kanga junga asaya liasü.

Novak Djokovic mezüngbuba round nung tsükatokba den top-ranked Jannik Sinner yiruba ajanga iba asayamung nung masayaba mapang iba asayamung akoktsü atema Alcaraz jenjang tajungba kümogo.

Kasa asayamung tetsür kija asaya nung Sabalenka-i mezüngbuba round nung Camila Osorio 6-2, 6-4 agi kokogo.

Asaya nung lai unforced errors 23 mena saka winners 32 anguba ajanga liromedema aküm.

March ita Indian Wells aser Miami nung takok anguba sülen Sabalenka tang tashi nung asayamung ka nung danga final tonga asayar mali.

Maneni Japan tsür Naomi Osaka-a tanabuba round-i iogo. Mezüngbuba round nung la

Russia tsür Anastasia Zakharova den kanga toktepba asayar asaya 7-6 (8/6), 7-6 (7/3) agi kokogo.

Eighth-seeded Poland tsür Iga Swiatek-ia 6-2, 6-3 agi China tsür Wang Xiyu straight-sets nung koka tanabuba round tongtetogo.

Tebur kija asaya nung France nunger asayar Arthur Fils, shibai Cincinnati nung mezüngbuba ATP Masters title bena liasü pa Greece nunger Stefanos Tsitsipas-i 4-6, 7-6 (7/3), 6-1, 6-4 agi kokogo.

Canada nunger third seed Felix Auger-Aliassime-ia Australia nunger asayar Rinky Hijikata 7-5, 4-6, 6-3, 7-5 agi koka tanabuba round tongtetogo.

Teburtem rongnungsa America nunger eighth seed Ben Shelton-i Netherlands nunger asayar Tallon Griekspoor 1-6, 6-1, 7-6 (7/3), 6-2 agi kokogo.

Aston Villa-i Mbaye aser Harwood-Bellis na alizükogo



Ibrahim Mbaye

Taylor Harwood-Bellis

Rongjui/September 1, 2026 (Agencies): Aston Villa-i Paris St-Germain nungi Senegal nunger winger Ibrahim Mbaye aser Southampton nungi England nunger centre-back Taylor Harwood-Bellis na alizükogo.

Arishi küm 18 tain Mbaye ya Paris St-Germain nungi pound million 47 agi alizükogo aser Villa-i Harwood-Bellis atema pound million 29 tashi agütsütsü akok.

Villa-i arishi küm 24 tain defender atema ya anaben tashi bid asüba magizükba sülen tang pound million 25 agütsüogo aser pound million 4 add-ons agütsütsü akok.

Taoba season PSG nungi tetoktepba ajak nung 31 ben asayaba mapang Mbaye-i goal asem idaktsü aser assist ana süja liasü. Ligue 1 aser Champions League akokba mapanga pai team nem teyari agütsüogo.

Pa taküm World Cup nunga Senegal pur asaya pezüprongla nung asayaogo aser France goal 3-1 agi makokba asaya nung goal ka idaktsüba sülen pa ya tebur World Cup nung goal idaktsüba Africa nunger asayar tanobusang aküm.

Mbaye ya 2018 küm FC Versailles 78 nungi PSG nung aden aser arishi küm 16 asüba mapang 2024 küm August ita senior team nungi asaya tenzükba liasü.

Kasa mapang nung Manchester City indang youth academy nungi anitetsang Harwood-Bellis, ya 2024 küm Southampton-i pound million 20 agi alizükba liasü.

2022-23 season nung pa Burnley nung loan nung oa asaya aser Championship koka liasü. Iba sülen 2023-24 season nung Southampton pur Premier league-i promote asüba mapang pai teyari tulu agütsü.

Alejandro Garnacho, Johan Manzambi aser Nicolas Jackson nunger alizükba sülen Unai Emery team-i tang attack nung asayatsü atema Mbaye alizükogo.

Harwood-Bellis-i, Villa indang defence nung Ezri Konsa melentsü, shiba Premier League champions Arsenal-i pound million 55 agi alizükogo.

Villa puri tang transfer window nung pound million 280 shi entokogo, saka parnoki asayar ayokba nunga pound million 313 aazükogo.

INDIA OSANG :

Tapak 3 nungi...

PLI scheme anema Bank union...

PLI scheme ya 2020 küm benok aser housekeeping staff nungi tenzük General Manager tem tashi bank nung inyaktertem ajak atema kasa dang liasü. Iba inyakyim kübok incentives ya anogo ka nungi 15 tashi taah dak sendaka liasü, koba bank indang performance dak keta liasü.

Ajisüaka 2024 küm November ita Department of Financial Services-i bank tem dang Scale IV nungi VII

officer tem tashi jurila performance dak ajemdaker incentive formula benoktsü tuyu. Union temi ashiba agi, iba yagi officer 40,000 shi ayimjemer.

Formula tasenba kübok ketdangsür tejentembo anogo 365 tashi taah indang incentives angutsü, saka tanungba employees shilem 95 bo timba agi anogo 15 atema dang angutsü, ta union tem yagi ashi.

BILEMDANGANG

"Na kanga meyilongi dang renloka oaka memerangdangertem dang nungibo takaraba odar."